

Familiarization, Internalization, Articulation (FIA) Key Terms © 2025 Word Collective Released under CC BY-SA 4.0 license. Familiarization, Internalization, Articulation (FIA) Key Terms has been adapted in the following languages Tok Pisin, عربي, Français, हिंदी, Bahasa Indonesia, Português, Русский, Español, Kiswahili, 简体中文 from Familiarization, Internalization, Articulation (FIA) © 2025 Word Collective. Released under CC BY-SA 4.0 license by Mission Mutual

L

law

Taim ol manmeri i toktok long **lo** insait long Baibel, ol i minim ol tok stia we God i bin givim long ol manmeri bilong **Israel**. Insait long Olpela Testamen, God i bin givim ol lo long wanpela man nem bilong em Moses. God i toktok wantaim Moses, na Moses i bin tokim ol manmeri long wanem samting God i tok. Olsem na planti taim ol manmeri i save tok **lo bilong Moses** taim ol i minim lo we God i bin givim long ol manmeri long han bilong Moses.

Wanpela lo em i wanpela tok stia, o sampela tok stia we ol manmeri i nid long bihainim. Orijinel wod we yumi bin trensletim i go long wod “lo” insait long Baibel em i wanpela wod we ol manmeri i ken yusim long kot taim ol i brukim lo bilong wanpela kantri. Sapos wanpela man o meri i no bihainim wanpela tok stia, yumi bai tok olsem em i brukim lo. God i yusim Moses long tokim ol manmeri olsem sapos ol i bihainim lo bilong God, God bai **blesim** ol. Tasol sapos ol manmeri i brukim lo bilong God, God bai panisim ol. God i bin givim ol dispela lo bikos insait long pasin bilong harim na bihainim ol dispela tok stia, ol manmeri i ken stap olsem **gutpela manmeri** bilong God, na sindaun gut wantaim ol narapela manmeri.

Wanpela sotpela tok save bilong lo bilong God em ol 10-pela **komanmen** Long ol dispela 10-pela tok stia, yumi lainim hau long stap olsem gutpela manmeri bilong God, na hau long stap gut wanpela narapela. Jisas i mekim dispela lo i sotpela moa yet: Em i tok, “Laikim God wantaim olgeta bel bilong yu, na laikim ol narapela manmeri olsem yu laikim yu yet.” Ol dispela em ol impoten komanmen tru.

Insait long Olpela Testamen, yumi painim lo bilong God, dispela lo em i stap insait long ol namba wan faivpela buk bilong Baibel. Olsem na **ol Ju o Judaman** i bin kolim ol dispela buk olsem “lo” maski i no olgeta samting insait long ol dispela buk i toktok long lo. Sampela taim, taim ol Ju i toktok long “lo,” ol i minim tu **olgeta** buk bilong **ol Skripsa**, we i pat bilong Baibel yumi nau kolim olsem Olpela Testamen.

Olsem na, taim wanpela Ju man o meri i toktok long “lo” ol i ken toktok long lo we God i bin givim long ol manmeri long han bilong Moses, o ol i ken toktok long namba wan faivpela buk bilong Baibel, o ol i ken toktok long olgeta hap bilong Olpela testamen.

lawlessness

Wanpela man o meri husat i **save brukim lo** em ol i no save bisi long bihainim lo. Insait long Baibel, ol manmeri husat i save brukim lo i no save bihainim ol lo bilong God. Ol dispela manmeri em ol wiked manmeri, na ol komyuniti bilong ol i pulap long kainkain hevi. I no gat oda o pis insait long komyuniti bilong ol. Taim planti manmeri insait long wanpela komyuniti i no bihainim lo, bikhet pasin na raskol pasin i go save antap.

legion

Wanpela **lijen** em i wanpela bikpela grup bilong ol soldia bilong Rom-moa long siks tausen soldia i save stap insait long wanpela lijen. Insait long hap bilong Baibel we wanpela **dimon o spirit nogut** i tokim Jisas olsem nem bilong en em “Lijen,” em i min long tok olsem em i no wanpela tasol, em i wanpela bikpela grup tru bilong ol dimon.

leprosy

Leprosi em i wanpela sik bilong skin. Long tude, i gat wanpela sik na nem bilong en em leprosi we ol manmeri i save gat ol sua long skin bilong ol na ol dispela sua i ken kamap sting, na ol manmeri i ken lusim ol pinga bilong han na pinga bilong lek, o ol bikpela pat bilong bodi. Wanpela **lepa o leprosi man o leprosi meri** em i wanpela man o meri we i gat sik leprosi.

Maski planti Baibel trenslesen i yusim wod leprosi o lepa o leprosi man, dispela sik em i no bin stap long **Israel** long taim bilong Baibel. Dispela wod we ol i yusim insait long Baibel em i minim narapela kain sik bilong skin, o ating em i minim moa long wanpela kain sik bilong skin. Yumi no save stret.

Yumi no save long dispela sik, tasol yumi save olsem em i wanpela nogut sik tru, bikos man o meri we i gat dispela sik em i “**no klin**”-dispela em i min olsem dispela man o meri em i no fit long **wosipim o lotuim** God. Wanpela man o meri we i no klin em i no inap long stap insait long ol ektiviti bilong komyuniti. Em i mas stap autsait long komyuniti, longwe long ol narapela manmeri. Ol dispela kain lain i bin save werim ol kain klos we ol manmeri long dispela taim i bin save werim taim ol i krai bikos sampela lain i dai. Sapos ol narapela manmeri i kam klostu long ol, ol bai mas singaut: “Lukaut, mipela i no klin!” olsem na no gat lain i bai kam klostu.

Dispela sik em yet i no save kalap o spred long wanpela man i go long narapela man, tasol dispela sik em i save mekim ol manmeri i tingim hau **sin** i save

spred. Dispela sik em i save stat wantaim wanpela liklik spot, we i ken gro na karamapim olgeta hap bilong bodi. Long wankain we, sin i save stat olsem wanpela liklik samting, tasol em i save spred hariap tru. Wanpela man o meri we i gat dispela sik, em i no fit long wosipim God, na em i mekim ol manmeri i tingim olsem, sin tu i save mekim yumi i no fit long mekim wok bilong God.

Dispela sik ol i kolim leprosi insait long Baibel em i wanpela nogut sik tru na sampela taim God i givim ol manmeri dispela sik olsem wanpela panismen.

Taim wanpela man o meri i luksave long wanpela streinj spot long bodi bilong ol, ol i nid long go long wanpela **pris**. Ol pris em ol man husat i save wok insait long **tempel** bilong God long Jerusalem. Ol pris i save mekim ol manmeri i bihainim ol pasin bilong kamap klin: Ol pris i save mekim ol kastom wok bilong mekim ol manmeri i fit long wosipim God. Olsem na, ol pris i nid long disaid sapos wanpela man o meri we i gat wanpela spot long bodi em i klin, o nogat. God i bin givim ol tok stia bilong em insait long ol **lo** bai ol pris i save sapos wanpela spot em i tru tru dispela sik we ol lain i save pret tru long en, o sapos em i wanpela mak nating tasol. Sapos pris i no klia tumas, orait dispela man o meri we i gat spot i nid long stap em yet autsait long komyuniti long wanpela wik. Sapos dispela spot i gro, orait pris bai tokaut olsem em i wanpela sik bilong sin. Sapos dispela spot i kamap orait liklik, orait dispela man o meri i nid long wasim ol klos bilong em na em i ken kam bek insait long komyuniti. Bikos em i kamap klin gen.

levite

Ol Livai em ol manmeri husat i bilong ol traib bilong Livai, wanpela bilong ol 12-pela haus lain o traib bilong **Israel**.

Namba wan tumbuna papa bilong **ol Israel** em **Abraham**. Tumbuna pikinini bilong Abraham, Jakob, em i gat 12-pela pikinini man. Ol lain tumbuna bilong ol dispela pikinini man i bin kamapim ol 12-pela traib o haus lain bilong Israel. Wanpela bilong ol pikinini man bilong Jakob, nem bilong em Livai, na ol lain tumbuna bilong en em ol i save kolim olsem ol Livai, o traib bilong Livai.

Moses, we God i yusim long givim **lo** bilong em long ol manmeri bilong en em i bin wanpela Livai. Na brata bilong Moses, Aron em i wanpela Livai tu. Ol dispela Livai, husat i lain tumbuna bilong Aron, em ol i bin kamap **ol pris**. Ol pris em ol man husat i save wok insait long **tempel** bilong God long **Jerusalem**. Bipo long ol manmeri i bildim tempel, ol pris i bin wok insait long tabenakel-na em i wanpela tempel we i isi

long muvim. Em i wanpela tent. Bipo long tempel, em tabenakel, wanpela ples we ol Israel manmeri i bin save **wosipim** God long en. Em i wok bilong ol pris long ofaim **ol sekrifais** i go long God we ol manmeri i bringim i kam long ol. Ol i save lukautim tempel na tisim ol manmeri hau long wosipim God. Dispela em i wanpela impoten wok tru. Ol narapela Livai husat i no bin lain tumbuna bilong Aron em ol i impoten tu, bikos ol i helpim ol pris long mekim ol wok bilong ol. Ol i helpim tu ol pris long lukautim tabenakel, na bihain, ol i helpim long lukautim tempel.

Baibel planti taim i save toktok long “ol pris na Livai.” Ol pris em ol i kolim ol narapela nem bikos ol i moa impoten, maski ol pris i Livai tu.

lord

Wanpela **Lod** em i wanpela man husat i gat **atoriti**, na em i bin mekim sampela samting we i wokim na ol manmeri i soim rispek long em. Taim yu kolim wanpela man olsem “Lod,” yu wok long tok olsem dispela man i gat atoriti antap long yu. Insait long Baibel, yumi harim ol manmeri i kolim **king** bilong ol olsem Lod; **ol sleiv** i save kolim **masta** bilong ol Lod; na sampela taim wanpela meri i save kolim man bilong em Lod.

Ol manmeri i save kolim God Lod bikos em i gat atoriti antap long olgeta hap bilong graun. Taim ol manmeri i toktok i go long God, o toktok long God, planti taim ol i kolim em Lod long givim rispek long em.

Insait long Nupela Testamen, taim ol manmeri insait long **Israel** i toktok long Jisas na kolim em Lod, ol i min long givim rispek long em.

Bihain long **kirap bek** bilong Jisas, ol manmeri i toktok long Jisas na kolim em Lod, em ol i tok olsem Jisas i gat atoriti antap long ol, wankain olsem God i gat. Taim ol manmeri i kolim Jisas Lod bihain long kirap bek bilong em, ol i wok long tok olsem Jisas em i God.

Sampela taim em i no klia insait long Nupela Testamen taim dispela wod Lod em i toktok long Jisas, o long Papa God.

Taim yu wok long trensletim Lod, yu mas keaful long ol dispela samting:

Bipo long Jisas i kirap bek, planti manmeri i no ting yet olsem Jisas em i God. Taim ol manmeri i tok “Lod” long Jisas, dispela i min olsem ol i soim rispek long em: Ol i no min long tok “God” long Jisas. Insait long trenslesen bilong yu, yu ken skelim sapos yu laik yusim wanpela jenerel wod bilong soim rispek long ol dispela hap, na i no yusim seim wod olsem yu yusim long “Lod” taim em i minim God.

lord

Long sampela hap insait long Nupela Testamen, **Lod** em i toktok long God. Em i wanpela we **ol Ju** lain i save toktok long God taim ol i no laik long kolim nem bilong em bikos ol i rispektim em tru.